




1660







22, 150/B

S. III.

by A. Felbie

50

DE LA PEINTURE

DES PEVS EXCELLES

DE L'ANTIQUITE

DIALOGUE

A PARIS

Chez PIERRE LE DEUTY, Libraire

Maître ordinaire de la Bibliothèque du Roy

En la Cour du

M. D. C. C.

AVEC PERMISSION

Les que le cingne des...
 d'un réoit de ch...
 de l'ay l'allez...
 souffist d'istinct de celui de ce Philo...
 qui trouvoit qu'Aff...
 temps...
 de des...
 employe les deux millions que cette H...
 luy avoient... Mais luy...
 de l'ordonner vous...
 collation...
 mens...
 de qu'il n'a...
 les belles...
 les choses...
 l'ordonner...
 l'ordonner...
 l'ordonner...

PARIS

Chez P. B. R. L. E. O. N. A. R. D. Imprimeur
 ordinaire du Roy, rue St. Jacques, à
 l'Ecole de Vaucluse.

Avec permission de l'Académie de l'Université.
 1667

L'ORDRE PVBLIC
POVR LA VILLE
DE LYON,
*PENDANT LA MALADIE
CONTAGIEVSE.*



A LYON,
Par IEAN IVLLIERON, Imprimeur ordinaire
du Roy, & de la Ville.

M. DC. XLIIII.

ORDRE PUBLIC

POUR LA VILLE

DE LYON.

ÉTABLI PAR LE SÉNAT

ET CONFIRMÉ PAR LE ROY

LE 10 JANVIER 1793



DE LYON.

PAR AN-VICTOR, Lieutenant ordinaire

du Roy, le 10 Janv.

M. DE XLVII



A MESSIEURS
LES
PREVOST DES MARCHANS
ET ESCHEVINS DE
LA VILLE DE LYON.

MESSIEURS,
*Pour franchir le pas de ce que iustement
l'on iugeroit temerité premier que de sça-
voir le sujet qui m'a obligé d'entreprendre
cét œuvre, j'ay esté extrêmement combatu, mais
vaincu par mes yeux, qui ont veu les malheurs arri-
uez au sujet de la maladie contagieuse depuis l'année
mil six cens vingt-huit, iusques à l'année mil six cens
trente-huit; Auquel temps vostre Consulat m'ayant
fait l'honneur de me nommer pour l'un des Commis-
saires deputez pour le faict de la Santé; Et depuis ce
temps iusques à present ayant par la grace du bon
Dieu, veu plus particulièrement les malheurs arri-
uez, Et considéré qu'apres nos pechez, qui en sont la
premiere cause, ce qui a secondé Et entretenu le pro-*

grez de ladite maladie n'est prouenu que faute d'instruction & methode de ce qu'il conuient faire en ce rencontre ; ce qu'ayant esté negligé cy-deuant, i'ay creu que ie ferois tort à ma patrie si ie n'en laissois ce qui a esté de ma cognoissance , pour cooperer au bien public, à ce particulierement inuité par les grands soings que i'ay reconnu & veu que vos Predecesseurs & Vous, **MESSIEURS**, auez rapporté dans ces rencontres malheureux ; Ce qui m'a donné une ferme croyance que vous appuyerez mon dessein, & accepterez tres-volontiers comme Peres du peuple , ce qui Vous est offert par l'un de vos fideles Concitoyens ; & de plus,

MESSIEURS,

Vostre tres-humble & tres-
affectionné Seruiteur

G. CHEVALIER.



Aduertissement au Lecteur.

L est tres-vray que la Maladie contagieuse est vn fleau de Dieu pour chastier nos offenses, & sans nul doubte, les plus souuerains remedes que l'on y puisse apporter pour en estre deliurez, sont de recourir à sa Diuine bonté, & par penitences & bonnes œuvres détourner son ire & attirer sa misericorde.

Voilà les remedes qu'avec raison l'on peut nommer vrais preseruatifs & curatifs, & qui doiuent estre accompagnez d'une grande preuoyance pour esuiter les desordres que l'on a veu en cette ville de Lyon apres auoir possédé vne parfaite santé pour le regard de la Maladie contagieuse l'espace de quarante années ou enuiron, ayant oublié l'affliction receuë depuis les années 1581. iusques en l'année 1587. & les preceptes que l'on auoit pratiquez pendant ledit temps, fut l'occasion que l'année 1628. la maladie fit vn rauage prodigieux, & l'effroy fut si grand, que l'on ressembloit à des personnes dormans sans inquietudes dans des lits molets & surprins par des ennemis armez à l'auantage, lesquels terrassent tout ce qui se presente à eux. Ce fut le mesme es mois d'Aoust, Septembre, Octobre, Novembre & Decembre de l'année 1628. que la Ville se treuuant sans aucun precepte de ce qui auoit esté pratiqué ez dernieres maladies, fut surprinsé avec tant de violence, que premier que l'on eust recognu & pourueu à l'ordre necessaire pour empescher le progrez d'icelle, plusieurs milliers de personnes moururent, tant à cause de l'absence des principaux & meilleurs Bourgeois de la Ville, qui pour garantir leur vie, s'estoient retirez à la campagne; comme encores des Chirurgiens, qui en firent le mesme; & fut la demeure dans la Ville

si dangereuse, que mesmes Messieurs les Preuost des Marchans & Escheuins, les vns apres les autres furent contraints se retirer, soit pource que la maladie estoit arriüée en leurs familles, ou en leur habitation; de sorte qu'il ne resta dans la Ville pour le gouuernement d'icelle, que Messieurs les Commissaires deputez pour le faict de la Santé, avec les pauvres artisans, lesquels se treuuerent reduits en telle extremité par la cessation du travail, que plusieurs sans estre malades s'acheminoient avec les malades, afin de pouoir auoir du pain pour leur nourriture dans l'Hospital de S. Laurens, où ils treuuoient la mort en place de l'aliment qu'ils cherchoient pour leur vie. Pour à quoy remedier, fut resolu par Messieurs les Preuost des Marchans & Escheuins de la Ville, que tous les Bourgeois nourriroient les pauvres, & chacun iour, & à chacun pauvre seroit donné trois sols; & furent les pauvres distribuez ausdits Bourgeois, à qui plus, à qui moins, suiuant leurs commoditez.

Voila le commencement en abregé, du pitoyable estat auquel se trouua reduite la Ville.

Pour à quoy remedier, lesdits Sieurs Preuost des Marchans & Escheuins pour toute la Ville, eurent recours à la source de grace, & firent rendre vn vœu à sa Chapelle de Lorette.

Après ce premier & souuerain remede, il ne faut point douter que l'on ne rapportast tout le possible pour tacher de remedier à tous ces desordres. Et comme l'absence des Chirurgiens auoit obligé à demander secours à plusieurs bonnes Villes de leurs Chirurgiens, il en arriua bon nombre, mesmes quelques Religieux de la mort; & tel secours donna moyen d'establir la police pour empescher la frequentation des Infects avec ceux qui ne l'estoient pas, & dont aucuns furent punis à mort publiquement, afin de faire contenir vn chacun dans l'observation des Ordonnances de Santé; & par ce moyen la Ville de peu à peu fut soulagée de ce fleau; au moyen dequoy l'on cōmença à des-infecter & blanchir les maisons où la maladie auoit esté; de sorte que l'année 1630. la Ville se rendit habitable sans danger, & dura iusques à l'année 1631. que la maladie commençant de nouveau la charge, non toutefois si furieuse comme auparauant, ayant rencontré des personnes plus asseurez, & de la piteoyance & secours pour
empescher

empescher le progrez, fit que par la grace de Dieu, puis l'année 1632. iusques à l'année 1637. la Ville se treuua comme deliurée de cette maladie, laquelle recommençant l'année 1638. pour lors tant les Bourgeois qu'une partie des Artisans craignans un mesme rauage que celui de l'année 1628. se retirerent à la campagne: Cette retraite empescha que le progrez ne fut si grand, & les autres habitans restez dans la Ville furent tous consolez & resolus par la presence de Monseigneur l'Eminentissime Cardinal Alphonse Louis Du-Plessis de Richelieu Archeuesque de cette Ville, qui non content de faire sa residence dans la Ville, nonobstant les humbles supplications que luy firent Messieurs les Preuost des Marchans & Escheuins de s'esloigner, veu l'eminent peril qu'il y auoit à y demeurer. Au contraire, fit paroistre son zeile & sa charité iusques au dernier periode, non seulement en assistant les necessiteux, mais encores exposant sa personne, ouyt à confession un des Peres Capucins exposé pour le seruice des malades sans apprehension d'entrer dans un lieu infect & d'approcher le dit Pere iusques au cheuet de son lit bien peu de temps auant sa mort.

Monsieur d'Halincourt Gouverneur pour le Roy en cette Ville, y fit aussi sa residence nonobstant les mesmes supplications, & ce iusques que la Maladie s'approchant du lieu de sa demeure, il fut necessité pour quelque temps de se retirer à la campagne.

Ce retour & continuation de maladie obligea particulièrement les Sieurs Commissaires de Santé de prendre garde à ce qui pouuoit donner progrez à icelle, & en empescher le sujet.

L'on recognut que ceux qui faisoient le parfum à des-infecter les maisons n'y procedoient pas fidelemēt, si bien que l'on voyoit fort souuent des recheutes. Pour à quoy remedier, fut fait defences à toutes personnes de vendre du parfum à des-infecter, & lesdits Sieurs Commissaires firent l'emplette des drogues pour la composition dudit parfum, & apres le meslange fait d'icelles, ayās esté premierement puluerisées, en fut fait du parfum qui réussit parfaitement, & a esté depuis continué en cette sorte.

L'on recognut aussi que le peuple affligé craignant d'estre desrobé lors que l'on parfumoit leurs maisons, cachotent leurs hardes infectes, & sans les des-infecter ny blāchir, s'en seruoient

au retour de leur quarantaine. Pour à quoy remedier, Messieurs les Preuost des Marchans & Escheuins furent priez par les principaux Marchans de la Ville de faire leurs remonstrances à son Eminence, & obtenir de luy que des Religieux accompagnassent comme auparauât les Parfumeurs. Mais comme lesdits Religieux auoient és années precedentes receu quelque mescontentement par la medisance de la populace, qui est pour l'ordinaire la recompence que l'on doit attendre de ces sortes de personnes, lesdits Religieux s'excuserent, & offrirent pour le Spirituel d'exposer leurs vies, & quant au temporel que ce n'estoit à eux. C'est pourquoy pour y remedier l'on se resolut que les parfumages se feroient en presence de ceux qui seroient dans l'affliction, afin qu'ils eussent moyen de bien faire nettoyer, & encores empescher que leurs hardes ne fussent diuerties.

Ainsi la reformation de tous les manquemens puis l'année 1628. ayant esté faite, a si bien reüssi, que par la grace de Dieu, si la maladie n'a cessé entierement, du moins elle n'a fait du ravage comme par le passé.

Et quoy que ces afflictions predites soient grandes; outre ce, la Ville en general en a souuent & mal à propos receu vne autre, prouenant de ce que ayant demeuré quelques années sans que la maladie fust grande, ce neantmoins il s'est treuue de si mauuais Concitoyens, qui ont escrit à nos voisins & estrangers, soit pour leur interest ou autrement; qu'il y auoit du mal dans la Ville beaucoup plus que par la grace de Dieu, il n'y en auoit pas; & par ces faux bruits la Ville a beaucoup souffert en ce, qu'outre que nos voisins & estrangers ne venoient à l'emplette, ils ne souffroient pas l'entrée de nos marchandises en leurs Villes. Et ces bruits ne prouenans que lors que l'on sçait que l'on a ouuert l'Hospital S. Laurens; Il est bon d'y remedier, estant tres-necessaire d'y auoir tousiours quelques Religieux, & outre ce, dans la Ville l'on doit auoir des Hospitaliers gagez, pour estre prests quand l'occasion se presente de seruir, afin de n'auoir la peine d'en chercher & faire sçauoir le mal à sa naissance, & auoir moyen d'y remedier sans delay, en faisant de nuit enleuer les malades & quarantains par la commodité des deux Riuieres.

Pour conclusion, contre cette maladie, apres le premier & souverain

souuerain remede de la grace de Dieu, les deux principaux poincts sont, la diligence & la fidelité. La diligence doit estre en particuliere recommandation aux Sieurs Commissaires; Et la fidelité aux Officiers qui exercent leurs ordres. Et ces deux poincts estans fidelement obseruez moyennant la grace de Dieu, il est croyable que cette maladie ne fera iamais de si grands progresz comme elle a fait par le passé.

Puis donques que humainement l'opposition à ce mal consiste en ces deux poincts de Diligence & Fidelité, il semble necessaire d'en laisser le souuenir à la posterité, afin que si par la grace de Dieu, ayant demeuré long temps sans estre affligé de cette maladie; si apres ce temps là, que Dieu ne veuille, il arriuoit du mal, l'on puisse éuiter vn pareil desordre que celuy qui s'est veu en l'année mil six cens vingt-huit, en obseruant chacun ce qui a esté obserué, ou iugé deuoir estre obserué dans la fonction des charges tant des Commissaires, Religieux, Chirurgiens, que autres Officiers, ainsi que le tout est amplement marqué cy apres.

Pour l'ordinaire les Commissaires de Santé doiuent estre en nombre de dix; sçauoir deux Magistrats, vn Medecin, vn Exconsul & six Bourgeois ou Marchans; & lors qu'il conuient iuger quelque contrauention, faut necessairement que les deux Magistrats y soient, & trois des autres Commissaires; Et où il y auroit abséce de l'vn des Magistrats, en demãder vn autre pour Assesseur; tous lesdits Commissaires sont nommez par Messieurs les Preuost des Marchans & Escheuins de la Ville. Ausquels Commissaires, en suite des Lettres patentes cy-apres inserées, est donné pouuoir de iuger & faire punir les contreuepans ausdites Ordonnances de Santé, & de se seruir des Archers du Preuost, Archers du Guet & Archers de Robe courte, & autres Officiers de la Ville.

De la Charge des deux Magistrats.

Les deux Magistrats doiuent estre assidus dans la Ville, comme aussi au Bureau qui se tient pour le faict de la Santé, afin qu'ils ayent vne information entiere de toutes les contrauentions & desordres qui arriuent, pour faire punir les contreuenans, & proposer au Bureau les Ordonnances requises; pour obuier aux des-

ordres ; & finalement par l'autorité , & comme Chefs desdits Commissaires , faire contenir le peuple dans l'observation desdites Ordonnances ; & à mesme temps que la maladie commence , doivent faire publier & afficher vne Ordonnance , par laquelle particulièrement il soit defendu aux personnes infects & malades de frequenter ny vaguer par ville , & de se faire denoncer au Commissaire ayant la charge des denonces. Comme aussi à tous Medecins & Chirurgiens de faire leur denonce au premier soupçon qu'ils rencontreront de mal contagieux ; Defendre en outre la vente des vieux habits & linges , & finalement que aucun chef de famille ne puisse enuoyer estant malade , aucun de leurs domestiques , sans au prealable auoir fait faire visite & rapport comme il n'y a point du mal contagieux en la personne qu'ils enuoyent.

Lesdits Sieurs Magistrats Commissaires doiuent faire aduertir Messieurs les Preuost des Marchans lors qu'il conuient mettre des Notables aux Portes ; Ce qui se pratique quand il y a de la maladie contagieuse aux Villes prochaines ou loingtaines , ayans accez & negoce en celle-cy , avec priere ausdits Preuost des Marchans d'ordonner ausdits Notables , entant qu'il arriuaist quelque difficulté pour le fait de la Santé , estans en la fonction de leur charge , qu'ils ayent à en aduertir lesdits sieurs Commissaires , afin qu'ils y remedient.

De la Charge du Medecin.

Le Medecin se doit treuuer au Bureau pour voir le memoire des drogues qui sont demandées par les Chirurgiens ; lequel memoire est apporté au Bureau , & ayant esté reconnu necessaire par ledit Medecin , soit pour la qualité & quantité , de l'ordre du Bureau , ledit memoire sera enregistré , & au bas d'iceluy sera mis le mandement à l'Apothicaire pour en deliurer le contenu , & doit ledit sieur Medecin voir lesdites Drogues ou medicamens s'ils sont bons & de la qualité requise. Outre ce , ledit sieur Medecin visitera deux fois la semaine les Chirurgiens exposez , pour s'informer d'eux de la nature de la maladie & des malades , pour prescrire ausdits Chirurgiens l'ordre qu'ils auront à tenir au traitement d'iceux , & finalement quand il y a controuersé entre les Chirurgiens

rurgiens pour la condamnation à la visite des malades, il s'y doit transporter, pour sur les rapports d'iceux en resoudre.

De la Charge de l'Exconsul.

L'Exconsul doit particulièrement prendre garde que les bastimens, tant de l'Hospital S. Laurens des Vignes, la Blancherie, & ceux du Colombier, cōme encores ceux de la Fleur de lys, soient couverts & appropriez pour servir tant aux malades comme aux Quarantains; aura aussi la charge des emmeublemens desdites deux maisons, & procurera de Messieurs les Preuost des Marchans & Escheuins l'argent qu'il conuiendra pour subuenir aux frais de ladite maladie.

De la Charge du Tresorier.

Il doit payer tous mandats que luy sont faits par le Bureau, doit aussi treuuer les Officiers necessaires, soit Hospitaliers, Parfumeurs ou Gardes pour les malades, auxquels il paye leurs gages tous les mois; dont de temps en temps, & de ce qu'il payera sans mandat, il en doit prendre au Bureau mandat certificatif pour luy servir quand il rend son conte par-deuant Messieurs les Preuost des Marchans & Escheuins de cette Ville; lequel cōte il doit faire dresser à la financiere; pour raison dequoy il en couche la despesse en son conte, laquelle est alloüée; & dudit conte rendu à Messieurs les Preuost des Marchans & Escheuins, il en doit mettre copie aux Archiues de la Santé. Finalement doit auoir vn liure au Bureau servant de Journalier, pour escrire la recepte & despesse, afin de pouoir recognoistre quand il est en auance, pour procurer son remboursement.

Du Commissaire ayant la charge des Denonces.

Il doit estre assidu non seulement à la Ville, mais encores à sa maison; & en son absence doit y auoir vn domestique capable pour receuoir les denonces, lesquelles doiuent estre receuës en cette façon, Le du mois de del'année

ruë maison où pend pour enseigne ou appartenant à chez N. & marquer la profession & le nom du malade soupçonné, & mettre le nom du denonciateur.

Outre l'assiduité cy devant dite, la diligence est extrêmement requise en cette charge, afin d'empescher la communication. C'est pourquoy si tost la denonce receüe, il faut enuoyer vn Chirurgien pour visiter le malade denoncé, avec ordre audit Chirurgien, s'il recognoist qu'il y aye du mal, de defendre à tous ceux de la famille affligée ou autres qui se pourroient rencontrer en icelle, de vaguer ny frequenter, & d'apporter le nombre des personnes qui sont dans la famille affligée; ayant receu la response du Chirurgien, il se faut informer si le malade est en danger de mort, & s'il est necessaire de le faire confesser; auquel cas sans delay ledit sieur Commissaire ne differera de le faire assister à l'instant spirituellement aussi bien que corporellement, en faisant enleuer ledit malade la mesme nuit du iour de la denonce, ensemble les Quarantains.

Au commencement de la maladie, à la premiere, deuxième, & iusques à la sixième famille affligée, il est bon de faire tenir les autres Inquelins fermez dans leur demeure, afin de voir si dans vne quinzaine de iours il ne s'en treuuerait point de frappez; par ce moyen l'on empeschera la communication du mal, outre la terreur que l'on donne à la populace, & qui les peut détourner de frequenter avec les Infects. Mais quand la maladie a fait plus grand progres, il ne faut qu'enleuer les familles affligées, sans faire fermer les autres Inquelins pour éviter le desordre qui pourroit arriuer à cause de la nourriture & travail desdits Inquelins enfermez.

Tous les soirs faut donner aux Gardes qui cōduisent les Hospitaliers, vn Rolle de toutes les familles recognuës frappées de peste, signé par ledit Commissaire, afin qu'en suite dudit Rolle le Garde puisse sans empeschement faire enleuer les malades & quarantains, dont ledit Garde ne manquera le lendemain en suite du commandement que luy fera ledit Commissaire, d'en venir rendre raison, afin de sçauoir si tout a esté executé suivant son ordre.

Et lors qu'il conuiendra faire monter les Beches pour enleuer les malades & quarantains, faut donner billet audit Garde, adressant

dressant aux Reuerens Peres Religieux tant de S. Laurens que de la Quarantaine, afin qu'ils ordonnent suiuant ledit billet, aux Hospitaliers de monter, estant tres necessaire de ne souffrir que les besches soient amenées en Ville, sinon en suite des billets qui seront enuoyez par l'un des sieurs Commissaires de Santé.

Tous les iours de Bureau doit apporter vne note des denon-ces visitées qu'il aura receuës, qu'il laisse au Secretaire pour les mettre sur le liure du Bureau.

Finalemēt son liure de denonce doit estre tenu au net, avec vn repertoire pour plus grande facilité.

Et ne doit souffrir que aucun malade demeure dans la Ville, soit qu'il aye maison particuliere & detachée, ny en façon & maniere que ce soit, ains doit procurer qu'ils soient emmenez à S. Laurens, ou qu'ils allent à la campagne avec vn Chirurgien.

Le mesme sera obserué pour les quarantains, à ce qu'ils soient menez à la Quarantaine, ou bien logez hors la Ville.

De la charge du Commissaire ayant le Contrerolle.

Tous les matins il receura du Garde qui aura conduit les Hospitaliers, vn roolle des malades & quarantains qui auront esté enleuez; suiuant lequel roolle il sçaura tant à S. Laurens que à la Quarantaine, s'il est veritable, soit aux noms, soit au nombre des personnes, prendra pareillement du R. P. exposé pour le seruice des malades, le nom de ceux qui seront decedez, le iour & l'heure; comme encores de ceux qui gueris seront, mis en quarantaine, & en outre de ceux qui de la Quarantaine, estans malades, seront mis à S. Laurens, dont du tout tiendra registre, qui sera ordinairement sur la table du Bureau.

Fera en outre faire les parfums, & les distribuera.

Doit aussi mettre sur ledit Registre tout ce qui aura esté apporté à l'enleuement des malades.

Du Commissaire ayant la charge de sortir les Quarantains.

Le temps pour la quarantaine ayant esté reduit puis l'année

mil six cens trente-huit, à vingt cinq iours complets. Le Commissaire ne doit souffrir la sortie auparavant; & premier que sortir, les quarantains s'ils ont des facultez pour pouuoir payer leur despen-
se; en ce cas apres auoir conuenu, & retiré l'accord fait, à leur sortie leur doit faire rendre tous leurs linges & hardes, conforme à ce qu'il aura treuue sur le registre du Commissaire ayant la charge du contrerolle; à la sortie desdits quarantains donnera à chacun vn billet avec leur nom & surnom, afin que le Commissaire qui a la charge du parfumage puisse rendre les clefs au vray à qui appartiendra. Et comme plusieurs veulent aller faire leur quarantaine à la campagne, le Commissaire leur doit fournir billet; lequel billet il ne donnera que sur le certificat du Commissaire ayant la charge des parfumages, comme l'on luy a remis les clefs de la demeure de la famille affligée; & ne pourront lesdits quarantains reuenir en Ville, sans prendre billet du Commissaire, lequel ne le donnera qu'en suite du certificat des Officiers des lieux où lesdits quarantains auront fait quarantaine.

*Methode pour donner les Billets pour aller faire
quarantaine à la campagne.*

Nous Commissaires deputez pour le fait de la Santé en cette ville de Lyon, auons permis & permettons à N. & ceux de sa famille, d'aller faire quarantaine au territoire de en
maison détachée, sans vaguer ny frequenter, & à la charge de se faire denoncer aux Officiers des lieux, aux peines de nos Ordonnances. Fait ce

*Pour le retour de la Quarantaine, au bas du
Certificat doit estre mis:*

Nous Commissaires de Santé, Veule certificat cy dessus, auons permis à N. & tous ceux de sa famille, de se retirer en cette Ville, en leur demeure, au quartier de avec liberté de
vaquer à leurs affaires; & defences à toutes personnes de leur donner empeschement, attendu qu'ils ont fait le temps à eux ordonné pour leur quarantaine. Fait à Lyon le

Pour

13

Avec defences de luy donner em-

Du Commissaire ayant la charge du parsumage.

Le Garde conduisant les Parfumeurs, luy doit apporter vn mesme roole que celuy des denonces, afin qu'il ordonne le parfumage des maisons, & aura vn liure, sur lequel il mettra d'vn costé de iour à autre separément les maisons affligées, & de contre à chaque maison il mettra le nombre des chambres ou membres de maison qui auront esté parfumez, & lors qu'il reçoit de l'argent pour le parfumage qu'est cinq liures pour chacune chambre, il le doit noter au conte de celuy qui aura payé.

Et lors qu'il y a de la maladie aux Villes ou Prouinces éloignées ou circonuoinés, & qu'il faut faire parfumer les marchandises qui en seront apportées, le Commissaire susdit en a la charge, & doit en ce rencontre tenir vn liure de consigne de toutes les marchandises qui y seront apportées; & lors que lesdites marchandises sont purifiées, en donnant le billet de la sortie, il doit faire signer celuy qui les retire sur le registre, ayant au préalable escrit sur ledit registre l'argent qui aura esté donné pour le droit du parfumage d'ice lles, afin que cela serue d'une forme de controolle, & de temps en temps doit donner conte au Bureau, & remettre és mains du Tresorier l'argent qu'il en aura receu.

Le surplus de ladite charge se voit dans l'ordre qui se doit observer au parfumage.

Du Commissaire ayant la charge de la menuë dépense.

Il doit fournir & payer tout ce qui est necessaire pour la nourriture & necessitez desdites deux Maisons, à la reserue du pain & de la chair; lesquels deux articles sont payez par le Tresorier.

en

en suite des mandats qui luy sont faits ; neantmoins doit prendre garde que la chair soit bonne & le pain aussi. Doit faire la prouision du bon vin vn peu couuert, & des endroits de Millery, Charly, Yrigni, & Vernaison, attendu qu'ils sont de garde ; outre qu'estant de bon vin, cela oste le sujet que les parens & amis prennent d'en apporter à la Quarantaine, où souuent par ce moyen il est arriué des grands maux ; Doit charger les Cuisinieres tant de S. Laurens que de la Quarantaine, de bien conseruer la graisse qu'elles leuent superflüe au potage & au manger, laquelle sert pour faire des chandelles pour lefdites deux Maisons.

Et doit voir le nombre des Quarantains & autres enfermez de deux en deux iours, afin d'ordonner à l'Econome le pain & autres alimens qu'il leur conuient.

De la charge du Secretaire.

Il se doit treuuer en tous les Bureaux avec le registre, pour y enregistrer ce qui luy est ordonné, outre le liure des denonces, tenu en mesme forme que celuy du sieur Commissaire ayant la charge des denonces.

Doit ordonner aux Gardes l'heure d'ouurir, nettoyer & fermer le lieu où l'on tient le Bureau.

Doit aduertir les sieurs Commissaires lors qu'il conuient de s'assembler extraordinairement, comme aussi aux iours de l'Ascension, & de la feste S. François de Paule, & de l'Assomption de Nostre Dame; ausquels iours le liure de la Confrairie de la Santé est ouuert dans l'Eglise des R. P. Minimes ; dans laquelle Eglise tous lefdits sieurs Commissaires ensemblement aux iours de l'Ascension de nostre Seigneur & Assomption de nostre Dame communient ayant chacun vn cierge blanc alumé en main.

Finalement doit estre soigneux de faire publier & afficher les Ordonnances de Santé.

La reception des Officiers.

Tous Officiers doiuent estre receus au Bureau & mis sur le registre, ayant au prealable fait le serment de fidelité entre les mains

maines des sieurs Commissaires; Et premier que de les enuoyer en seruice, le Secretaire leur doit lire la fonction de leurs charges.

Du deuoir des Gardes conducteurs des Hospitaliers & Parfumeurs.

Ils se doiuent tenir proche la demeure des Commissaires ayans ladite charge des denonces & du parfumage, pour estre prests à effectuer les commandemens desdits sieurs Commissaires.

Doiuent nettoyer, ouurir & fermer le lieu où se tient le Bureau.

La nuit ayant receu l'ordre desdits sieurs Commissaires, ils se doiuent rendre au lieu où les besches doiuent aborder, & s'y treuuer auant la venuë desdits Hospitaliers & Parfumeurs, lesquels ils doiuent conduire à enleuer ou parfumer ce qui est noté sur l'ordre & non ailleurs, à peine d'estre punis.

Doiuent aduertir les Quarantins où l'on va parfumer, de bien faire parfumer leurs maisons, & prédre garde que les Parfumeurs n'emportent rien du leur, & cōme encores de bien faire enleuer le linge sale & le mettre en conte; quand les Hospitaliers sortent ils doiuent demander aux Quarantins si lesdits Hospitaliers ont bien nettoyé, & s'ils se plaignent desdits Hospitaliers; & en cas de plainte, en auertir Messieurs les Commissaires le lendemain sans delay.

Du nombre des Religieux qu'il est necessaire d'auoir tant pour S. Laurens, comme pour la Quarantaine.

Au commencement de la maladie il faut auoir dans S. Laurens deux Religieux, sçauoir vn Prestre & vn lay, dans la Quarantaine de mesme.

Lors que la maladie fait progrez & que l'Hospital S. Laurens se treuue chargé de plus de cinquante malades, pour lors il est necessaire d'y auoir deux Prestres & vn Frere lay, cōme aussi à la Quaartaine lors que les Quarātins sont en plus grand nōbre que de cēt Quarātins; & pour lors ce surcroy de Religieux est necessaire pour aller cōfesser par la Ville, & neantmoins sont residen-

ce à S. Laurens, & s'employent outre ce, au seruice des malades dudit S. Laurens.

La demande desdits Religieux se fait à Monseigneur l'Archevesque, & en son absence à Monsieur son Grand Vicaire, & sont enuoyez lesdits Religieux pour seruir ausdits malades comme leurs Curez ou Vicaires.

Charge du R. P. Religieux ayant l'intendance dans S. Laurens.

Lors que la maladie n'est pas grande, & qu'il est seul avec le Frere lay, il exerce le contenu es deux charges; mais quand il y a deux Prestres, sa fonction principale est de prendre garde que Dieu ne soit offensé, soit par blasphemies ou autrement, que la paix soit entre les Officiers, & que les malades soient seruis avec charité; & empescher l'oisiuete parmi les Officiers, laquelle ne produit que vice, & prendre garde d'employer les conualescens à quelque travail leger pour les diuertir, & à la separation des hommes d'avec les femmes.

Du second R. P. Religieux estant dans S. Laurens.

Doit accompagner les Chirurgiens lors qu'ils pensent les malades, & prendre garde que lesdits Chirurgiens les traitent avec charité; doit aussi auoir soin particulier pour la nourriture desdits malades, à ce qu'il leur soit donné conforme à l'ordre des Chirurgiens, & le faire ainsi punctuellement observer aux Gardes; outre ce, doit prendre garde exactement que aucunes hardes ny linges sortent de S. Laurens sans estre parfumez & blâchis.

Et finalement quand il est besoin pour venir confesser des malades à la Ville sur le billet qui sera enuoyé par l'un des Commissaires, il viendra incontinent & ne marchera par ville sans auoir vn Garde pour le conduire.

De la charge du Frere lay.

Il doit tenir registre & recognoistre tout ce qui est enuoyé à S. Laurens,

S. Laurens, soit pain, vin, chair, medicamens, hardes, linges, & generalement de toutes choses qui y sont apportées.

Doit encores auoir charge du blanchissage des linges & hardes.

L'ordre de la reception des malades à S. Laurens.

Lors que le R. P. Religieux a eul l'ordre de l'un des sieurs Commissaires de Santé pour faire monter les besches pour enleuer les malades, & que le Garde luy a dit le lieu où ils doiuent aborder le soir, il fait monter les besches aux Hospitaliers, auxquels il doit particulièrement recommander de porter le brancart à sangles pour enleuer lesdits malades, & doit la besche où lesdits malades sont, estre couuerte; arriuant à S. Laurens le R. P. se doit informer si les malades ont esté confessez; & ayant pourueu à cela, il doit ordonner du lieu où l'on doit placer lesdits malades; lesquels iugeant qu'ils soient proche de mourir, il leur doit donner le Viatique; & s'est veu la charité à aucuns Religieux, qu'ils administroient ausdits malades moribons l'Extreme Onction.

Lesdits malades estans placez, le R. P. doit prendre le nom & furnom d'iceux, la ruë & enseigne de leur habitation, & leur profession, & mettre le tout sur vn liure, chacun separément d'un costé, avec l'inuentaire de ce que chacun aura apporté, & de l'autre costé mettre leur mort ou leur guerison; s'ils meurent, mettre le iour, le mois, l'heure & l'année du decez; s'ils guerissent, faut mettre le iour que ils seront sortis de S. Laurens pour entrer en quarantaine.

Le mesme deuant estre obserué pour le regard de ceux qui de la Quarantaine sont passez malades à S. Laurens.

Et dautant que cy-deuant pour le regard des enfans de mamelles, ou autres qui n'ont la raison de pouoir dire quels sont leurs pere & mere, ny la profession & demeure d'iceux, au moyen de quoy il est arriué grande confusion, ne pouuans asseurer de quelle famille estoient ces petites creatures innocentes preseruées au milieu de ce mal; pour à quoy obuier, il est necessaire à leur arriué de leur attacher vn billet au col, où le tout soit escript, assauoir le nom du pere & de la mere, la profession, la demeure &

la ruë d'icelle, ledit billet au prealable bien enucloppé dans du linge, & par ce moyen la mort des pere & mere arriuant, l'on sçait d'où ils sont sortis.

Ausdits enfans affligez estans à la mamelle, leur sont donné des Nourrices, qui sont prises à la Charité ou à l'Hospital, en les payant à raison de dix liures par mois; & outre les Nourrices, est bon d'auoir des cheures pour auoir du laiët pour ayder à nourrir lesd. enfans.

*Du nombre des Officiers necessaires dans S. Laurens,
& ce qui depend de leur charge.*

Quand le nombre des malades excède quarante, il faut auoir deux Chirugiens.

Selon la violence du mal il faut des Hospitaliers; mais incontinent qu'il se recognoit de la maladie, il en faut du moins trois; sçauoir, deux Bateliers & vn autre robuste pour porter, & l'vn d'iceux lors qu'il y a diuers enleuages, doit demeurer dans la beche à prendre garde aux malades qui auront esté apportez, pendant que les autres en retournēt querir d'autres, & ce afin que personne n'aborde lesdits malades; & que s'ils entroient en délire, ils ne se precipitassent dans la riuere, ou n'abordassent quelcun.

Quand il y a beaucoup du mal, il faut vn Portier, pour de Gardes pour les malades, à dix malades il faut vne Garde.

Pour de Cuisinieres, c'est suiuant le nombre qu'il y a tant malades que Officiers.

Les Chirugiens ayans acquis la maistrise en suite de l'Arrest du Grand Conseil du dixième iour de May 1630. en faueur & reconoissance des seruices par eux rendus pendant les années precedentes, sont obligez de seruir à tour de roolle & par quartier, & leur est payé trente liures par mois, reseruant vingt liures par mois pour leur nourriture, qui monte en tout cinquante liures, & pour le temps de leur quarantaine à moitié gage; & depuis sans contreuenir à l'accord fait, a esté resolu au Consulat, pour obliger lesdits Chirugiens à seruir de mieux en mieux, qu'à leur sortie s'ils se treuuent auoir bien serui, en rapportant certificat des sieurs Commissaires, Messieurs les Preuost des Marchans & Escheuins leur donnent les soixante liures reseruées pour leur nourriture des trois mois de leur seruice.

Du deuoir des Chirurgiens.

Qu'ils soient vn ou plusieurs, il faut que la fidelité accompagne toutes leurs actions, & principalement quand ils font les visites; doiuent en outre estre charitables à traiter les malades, & les pēser deux fois le iour, sçauoir soir & matin, & au milieu du iour les visiter. La diligence est extremement requise quand ils sont appelez pour faire quelques visites à la Quarantaine, afin d'empescher la communication du mal.

Ne doiuent enuoyer en Quarantaine aucun malade que la playe ne soit entièrement cicatricée, & doiuent aduertir le R. P. Religieux lors qu'il y a quelcun en peril de mort, afin que le R. P. agisse charitablement pour le salut de l'ame du moribon; doiuent de temps en temps donner roolle des medicamens qui sont necessaires pour les malades, sans en demander sinon ce qui peut estre necessaire pour quinze iours; & finalement est defendu ausdits Chirurgiens d'exiger aucune recompense des malades, à peine d'estre punis; & si quelcun leur veut donner gratuitement quelque chose, ce ne sera qu'apres la guerison ou par la recommandation qu'en fera ledit malade au R. P. apres la mort.

Du deuoir des Hospitaliers.

Les Hospitaliers à peine d'estre punis, doiuent obeir aux commandemens des R. P. Religieux, & ne peuuent ou doiuent sortir dudit Hospital S. Laurens sinon par la permission ou commandement desdits Peres.

Ne doiuent aller par ville soit de iour ou de nuit, sans estre conduits par vn Garde, soubz mesme peine.

Ne doiuent emporter des maisons affligées autre que le liēt où se treuue couché le malade, ny exiger desdits malades ou autres pour eux, aucune chose: que si volontairement il leur est donné, ils peuuēt recevoir, & à leur arriué le remettre entre les mains du R. P. pour leur estre reparti à leur sortie; le tout soubz peine de punition.

Finalement doiuent traiter les malades lors qu'ils les emportent, avec charité & sans iurer & blasphemer ou iniurier lesdits malades.

Le iour se doiuent employer à enterrer les morts, blanchir les lin-

ges & hardes , & autres œuvres qui leur seront commandées par les Reuerans Peres.

Du deuoir du Portier de Saint Laurens.

Ce n'est que lors que la maladie est grande que l'on met vn Portier à S. Laurens , & son employ en ce temps est , de tenir le liure de ceux qui sont amenez malades , qui meurent , ou sont par leur guérison mis en quarantaine , & ce pour soulager le R. P. outre ce, il se doit prendre garde lors que quelcun demande, de le faire sçauoir au R. P. & ne doit ouuir pour receuoir ou parler sans la permission dudit R. P. duquel il doit prendre les clefs , & les luy rendre , & particulièrement tous les soirs.

L'ordre pour receuoir Testamens.

Lors que l'Hospital S. Laurens est ouuert au sujet de la maladie contagieuse , faut faire publier vne Ordonnance à tous Batteliers & Battelieres de conduire ny aborder puis les piles de la Blancherie iusques au bois de la Quarantaine, s'estant remarqué és années 1628 & autres suivantes iusques à l'année 1638. que plusieurs malades pour auoir esté amenez sur la galerie , ayans veuë sur la riuere pour faire leurs testamens, en sont morts bien peu de temps apres, outre les abus commis à la reception de ces sortes de testamens , qui ne peuuent valoir attendu la distance , qui ne peut permettre de croire que le Notaire puisse oïr le Testateur, ny les tesmoins non plus, & en s'approchant ne pourroient le faire sans danger. C'est pourquoy lors que le malade veut tester, le plus seur & meilleur moyen seroit, que le R. P. enuoyé à S. Laurens pour seruir de Curé ou Vicaire aux malades, receust leurs actes de derniere volonté, conformément à l'Ordonnance, en presence de sept personnes qui sçachent signer, & à defaut fera mention dans l'acte n'y auoir eu dans S. Laurens de tesmoins ou suffisamment , ou qui sçachent signer , & fera aussi signer le malade s'il sçait signer , & à defaut en fera mention ; & lors que le R. P. aura receu quelques Testamens, il fera appeler le Secretaire du Bureau pour en presence des tesmoins luy faire lecture du contenu en iceluy ; & apres auoir bien parfumé l'Original , le remettra audit Secretaire ; le
tout

tout dans deux iours au plus tard apres la reception de l'acte; lequel Testament ledit Secretaire copiera sur le Registre, afin qu'à la sortie du R.P. il les signe; & conseruera ledit Secretaire lesdits Originaux, pour seruir en cas que ledit R.P. vint à mourir sans auoir signé sur le Registre.

De la Quarantaine.

Il faut auoir trois lieux separez pour faire trois quarantaines. L'une pour les Quarantins amenez de la Ville, avec separation des hommes d'avec les femmes. La seconde pour les malades qui auront esté gueris & sortent de S. Laurens, avec mesme separation. La troisieme seruant d'approbation pour y mettre ceux qui apres auoir demeuré vingt iours en l'une des deux premieres, y sont mis encores cinq iours. Et en entrant en toutes les Quarantaines, premier que d'estre les Quarantins placez aux cabanes, les faut faire parfumer quand mesmes on les enuoye d'une quarantaine à l'autre; & lors que dans lesdites quarantaines il se treuve quelque quarantin frappé de la maladie contagieuse, faut faire emporter le liét du malade dans S. Laurens, & faire parfumer les liets qui se treuueront dans ladite Cabane, comme aussi tous les quarantins d'icelle, & mesmes la cabane auant que d'y remettre les quarantins, & noter le iour de la recheute, afin de faire recommencer la quarantaine aux Quarantins qui se seront rencontrés dans la cabane où la maladie aura prins.

Et quant aux enfans de mamelle ou sans raison de pouuoir dire leurs pere & mere, leur profession & demeure, sera vsé à leur arriuéee comme a esté noté pour ceux de S. Laurens au chapitre de la reception des malades, soit que leurs pere & mere soient amenez avec eux ou autrement, pour obuier aux confusions cy-deuant arriuéees.

Du Religieux ayant la conduite des deux premieres Quarantaines.

Il doit prendre garde à ce que le blasphemé & tout vice soient bannis de ce lieu, & que la pieté & vertu y soient exercées, leur cele

celebrât la S^{te} Messe tous les iours, & le soir leur faisant la priere, le iour en allant par les quarantaines les exhortant en particulier, attendu que les assemblées ne sont nullemēt à propos en ce lieu, & doit faire trauailler le iour lesdits Quarantins à se reblanchir leurs linges & bien nettoyer, pour les empescher d'une trop grande oyfueté.

Toutes les nuits lesdits PP. avec quelques Officiers doivent faire la reueuë des quarantaines demy heure ou enuiron apres la retraite sonnée, afin de voir si chacun se contient, & si lesdits Quarantins ont ce qui leur est necessaire pour leur coucher.

Du R.P. Religieux gouvernant la Quarantaine d'approbation.

Il doit comme aux autres Quarantaines, empescher le vice & y establir la vertu & pieté; doit faire blanchir tous les linges & hardes qui sont apportées de la Ville apres que ceux des deux premieres Quarantaines les luy auront remis les ayant ja blanchi vne fois en leur particulier; & afin d'euitier le meslange, tout ce qui sera d'une famille le R.P. le fera mettre en liasses, & en chaque liasse vn plomb, sur lequel on marquera vn numero, que l'on donnera au particulier, & par le moyen du liure de numero l'on pourra treuuer ce qui appartiendra à vn chacun pour leur rendre à leur sortie, & leur oster tout sujet de rien cacher de ce qu'ils auront d'infect.

Du deuoir du Frere lay.

Il se doit prendre garde à ce que generalement les Quarantins ayent ce qui leur est necessaire pour leur nourriture, & assister à la distribution qui s'en fait.

Doit tenir registre & recognoistre comme celuy de S. Laurens, de tout ce qui est apporté à la Quarantaine, soit pain, chair, & generalement tout ce que l'Econome aura ordre d'y deliurer.

Du deuoir de l'Econome.

Il doit faire apporter tout ce qui est necessaire, & que luy est ordonné

ordonné par le sieur Commissaire ayant la charge de la menuë despenſe, ſoit pour la nourriture des malades de S. Laurens & des Quarantins, & le deliurer aux Freres lays qui en tiennent registre, & le recognoiſtront en ſa preſence, afin que s'il y a du meſconte, il y remedie ſans delay.

Il doit auſſi tous les iours s'informer du R.P. de S. Laurens & des Quarantaines ſi l'ordre eſt parmi les Officiers & Quarantins, afin que s'il ſe rencontre quelque vicieux ou deſobeiſſant, il en aduertisse Meſſieurs les Commissaires pour y remedier.

Du deuoir des Parfumeurs.

Ils ne doiuent venir en Ville avec la Beche ou autrement, ny fortir de la Quarantaine ſans la permission du R.P. ny aller par ville ſans vn Garde, à peine de punition corporelle; de meſme s'ils exigent quelque choſe des Quarantins chez lesquels ils doiuent parfumer; que ſi quelcun gratuitement leur donne quelque choſe, à leur arriuée ils le doiuent remettre au Reuerend Pere, qui le gardera pour le repartir à leur sortie; le iour ils ſe doiuent employer au blanchiſſage des linges & hardes, & parfumer les Quarantins.

Du Portier.

Ne doit laiſſer entrer perſonne à la Quarantaine ſans billet de l'un des Meſſieurs, ny ſouffrir qu'il ſoit donné aucune choſe par ceux qui ont billet pour y entrer, ſans le ſceu & conſentement des Peres, ny laiſſer paſſer vn Quarantin d'une quarantaine à l'autre ſans aduertir le R.P. & en auoir ſa permission, le ſoir doit remettre les clefs à la chambre du R.P. & prendre garde à la venuë des quarantins, pour les loger la premiere nuit à la chambre ioignant le parfum.

De la nourriture des Quarantins.

Tous les iours à chacun Quarantin doit eſtre donné vn pot de vin pur, deux liures pain blanc, vne liure chair bouillie avec du bouillon.

Aux Officiers doit estre donné à chacun deux pots de vin pur, deux liures pain blanc, & vne liure & demy chair bouillie, & le bouillon.

Les Vendredy & Samedy en place de la chair, leur sera donné la valeur de deux beures de trois deniers piece, deux œufs, trois onces fromage, & du potage.

Et aux Officiers le double des Quarantins.

Observation pour le Parfumage des maisons.

Le Commissaire ayant receu le roole des maisons affligées, doit donner ordre à ce que le iour suiuant tout au plus tard lesdites maisons soient parfumées, & par le billet qu'il mande au R. P. pour faire monter les Parfumeurs, il doit marquer par ledit billet de faire monter vn ou deux quarantins des maisons affligées pour bien voir, & faire parfumer leur demeure, & enchargera ledit R. P. ausdits quarantins de bien faire nettoyer & apporter tout ce qu'il y aura d'infect; & que s'ils ont quelque chose de precieux dans des coffres ou cabinets, lesdits quarantins le passent eux mesmes sur le parfum, & en suite le serrent; apporteront lesdits Parfumeurs particulierement les linges sales apres que les quarantins en auront fait memoire, suiuant lequel & à leur sortie le R. P. leur deliurera tout ce qu'ils auront apporté, pour oster tout sujet ausdits quarantins de rien cacher; & quant aux hardes qui ne seront que soupçonnées pouuoir estre infectes, apres que la chambre aura esté bien baliée, & la paillasse du liét infect emportée, & au bord de la riuere brulé la paille, ayant bien fermé tous les endroits de la chambre que l'on doit parfumer, par où le parfum se pourroit euaporer, mesmes la cheminée, il faut mettre sur des cordes ou autres choses, les hardes restantes suspenduës en l'air, & au dessous en cinq endroits de la chambre y mettre la valeur de deux liures parfum concassé, & y ayant mis le feu, ce qui se fait en touchant le parfum avec vn charbon ou chandelle alumée, les Parfumeurs se retireront, & les quarantins qui les ont assisté ferment eux-mesmes leur demeure & emportent la clef, laquelle le lendemain ils remettent au Garde qui les va querir, qui les prend apres les auoir fait passer au feu où lon met

met du parfum, & à chacune il y met vn lien avec vne carte, où il met le iour du parfumage, le nom, surnom du maistre de la clef, le nombre des chambres parfumées & du Garde qui a assisté au parfumage; & ledit Garde en suite remet lesdites clefs au logis du Commissaire ayant la charge des denonces, qui les range par ordre alphabetique de la premiere lettre du surnom, & en deschargera & nottera le liure du parfumage; & où il se rencontreroit qu'il n'y auroit des quarantins dans vne maison affligée pour voir parfumer, en ce cas se faut informer quels sont les parens, & les aduertir, afin de se tenir à la ruë pendant que lon parfume ladite maison, & pour lors le Garde doit dire aux Parfumeurs quand ils sortent, de vuidier leur sac & poches, afin de faire voir ausdits parens que lon ne leur emporte rien.

Et pour rendre les clefs à la sortie, le Commissaire en suite du billet de retour de quarantaine, rend les clefs au propriétaire, en faisant payer cinq liures pour parfumage de chacune chambre, sinon que les propriétaires soient pauvres, auquel cas lon les quite gratis.

Et comme il arriue souuent que les chefs de famille meurent, & que les enfans ou seruans restans ne peuuent receuoir valablement les clefs, le Commissaire ne les doit rendre qu'en suite d'une Ordonnance de Messieurs du Siege; laquelle Ordonnance doit estre mise sur le registre pour la décharge du Commissaire, & afin qu'il ne soit obligé la garder.

Composition du Parfum à des-infecter les maisons.

Souffre nonante-huit liures, anthimoine sept liures, tartre sept liures, poudre fine de chasse trois liures & demy, carabé vne liure & trois quarts, arsenic trois liures & demy, orpiment vne liure trois quarts, canfre vne liure cinq onces. Faut bien faire piler le tout separément, & ayant fait fondre le souffre dans vne marmite de fer, les poudres cy dessus bien meslées, sont mises dans ledit souffre peu à peu; cè fait, l'on a vne pierre cauée de la grandeur que l'on veut faire les pains, & ayant mis du papier sur ladite pierre, l'on iette la composition dessus, dont il se fait plusieurs pains.

*Composition du Parfum doux pour le Corps, enuoyée
à Monseigneur l'Eminentissime Cardinal
de Lyon.*

Faut mettre en poudre souffre, rezine, gomme de geneure, encens, myrrhe, benjoin, storax, scauiffon de canelle, laudanum, anis vert, calamus, astirolоче rond, gingembre, poiure, yris de Florence, lauende, mente; de tout ce que dessus portions esgales; à quoy faut adiouster autant du son que toutes les parties cy dessus ensemble, & mesler le tout pour se seruir. De laquelle composition se faut tenir nud dans vn lieu bien clos, entre deux ou trois rechauds remplis de charbons ardents, & y ietter dessus vne poignée de ladite composition, & en receuoir la fumée.

*Composition du Bain pour ceux qui ont eu la maladie,
pour pouuoir dans dix iours frequenter.*

Faut prendre du sel, de poudre de clous de gerofle, de poudre d'yris de Florence, autant de l'un que de l'autre, & le mettre dans vne grande bassine avec de l'eau de vie, le faire bien chauffer, & s'en lauer.

*Methode pour des-infecter S. Laurens & les Qua-
rantaines la maladie estant cessée.*

Faut auant que passer les Hospitaliers en quarantaine, leur faire vuidier toutes les plumes des coitres & trauerfis dans le milieu d'une grande chambre, à laquelle il y aye des filets aux fenestres pour empescher que la plume n'en sorte, & mettre aux quatre coings de ladite chambre sur la moitié d'une tuile du parfum avec vne autre tuile droite pour empescher que le feu n'alle aux plumes, & que la fumée neantmoins puisse sortir par dessus, & parfumer ladite chambre, laquelle pour lors que le parfum est appliqué, doit estre bien fermée, & y ayant mis vne fois ou deux du parfum, faire bien remuer lesdites plumes, & les laisser quelque temps à l'air, & en suite pour la troisième fois y mettre du parfum
comme

comme auparauant, & les laisser vne année à l'air si faire se peut, auant que de les employer à faire coitres ou trauerfis; Les fleines desdites coitres & trauerfis seront liciuées vne fois dans S. Laurens, & vne fois à la Quarantaine, mesmes les laines des matelas seront liciuées deux fois, comme aussi les fleines d'iceux; & finalement combleront la fosse des morts, sur lesquels ils mettront ordinairement de la chaux viue.

Nettoyeront, aragneront & balieront par trois fois toutes chambres & cabanes, & y mettront par trois diuerses fois du parfum; Et pour le grand corps où auront esté les malades, faudra lauer les carreaux avec de l'eau & du vin outre ce que dessus, & en suite faire blanchir.

Le mesme sera fait à la Quarantaine, ou lors que l'on passera les Officiers de S. Laurens, les faudra bien faire parfumer, le corps & leurs habits, & ayant nettoiyé icelles, auant que sortir se doivent lauer de la composition du bain cy-deuant marquée.

Remarques pour cognoistre quand vne personne est frappée de peste.

D'abord grand mal de teste, mal de cœur, mal de reins, ce qui arriue souuent au costé gauche en forme de pleresie, accompagné du vomissement ou nozée, & grand' enuie de vomir, foiblesse si grande que l'on ne peut se tenir debout ny leuer la teste en haut sans chanceler ou estre saisi de vertige, la langue chargée & aride, les yeux douloureux deuiennent rouges avec des legers & frequents frissons de tout le corps, peu de temps apres l'on sent des douleurs, soit aux haines ou aux aisselles ou proche les oreilles, qui redoublent par interuales frequents, & sont bien tost suivies de quelques tumeurs ou glandes enflées.

Autres fois tout à coup l'on recent en quelque partie du corps vne picure prompte & violente, semblable à la picure d'une esguille où se remarque vne petite pustule ressemblant à vn grain de verole my meur, & c'est là le commencement du charbon, qui est de diuerse condition suiuant la diuersité des malades, des humeurs & du venin, la fieure accompagne tous les susdits accidens dès le commencement, & autres fois apres, mais rarement.

Preservatif contre la maladie contagieuse.

L'apprehension de soy cause bien souuent la maladie, c'est pourquoy il est bien à propos de ne rien apprehender, & pour vray preservatif aux apprehensifs, c'est l'éloignement qu'ils doivent faire des lieux où est la peste. & vser de pilules de tribus, *citò, longè, tardè*, c'est à dire, à mesme temps fuir bien loing, & revenir tard. Pour les autres personnes qui sont contraincts, ou qui veulent demeurer aux lieux infects, le premier preservatif est, de se reconcilier avec Dieu, faire ferme resolution de ne le point offencer, & assister autant qu'il leur sera possible, les necessiteux, honteux & mandians, & les malades de peste, parce que ce fleau de Dieu s'apaise & esuite plustost par prieres & oraisons que par remedes; lesquels neantmoins ne sont à mespriser puis qu'ils sont creez de Dieu pour soulager le genre humain; pour ce sujet faut auoir recours aux Docteurs Medecins & experimentez, mesmes au faict de peste, lesquels suiuant la diuersité des personnes, lieux pestiferez & de la peste, changent souuent les conditions & qualitez des remedes; si bien qu'il ne seroit necessaire d'en escrire aucuns pour se preseruer de la peste, n'estoit que plusieurs n'ont ny les biens & comoditez, ny le tēps pour consulter les Medecins, qui le plus souuent sont esloignez des villes affligées pour crainte qu'ils ont plustost de leur famille que de leur personne, ou qui au commencement de la peste sont surprins en leurs visites, & deceus par les malades, qui celēt pour l'ordinaire le mal; ce qui les oblige de se sequestrer de la compagnie des autres pour quelque temps. Ceux donques qui se rencontrent aux lieux infects, obserueront au mieux qui sera possible ce qui s'ensuit:

Le lieu de leur habitation doit estre, s'il se peut, plustost haut que bas, pour la respiration d'un air plus pur, laissant à iuger aux Docteurs Medecins si en certaines pestes les lieux bas sont plus sains que les esleuez, veu mesmes que aux villes l'on ne peut recōtrir toutes les comoditez, & l'on est contrainct bien souuēt de demeurer en maisōs, les vnes basses les autres hautes; mais en quelle sorte que soit l'habitation, il est bon quād les vents frais soufflēt de tenir les maisons ouuertes, cōme aussi lors que le vēt marin fait
de

de les tenir fermées, doiuent estre lesdites maisons bien baliées & nettoyyées en toutes leurs parties, & estre arroufées le soir & le matin avec vinaigre; & à defaut d'en auoir suffisamment, y mettre la moitié d'eau, en esté arroufer froidement, & en hyuert chaudement, les parfums desdites maisons faits avec vinaigre versé sur vne pelle ardente est bon, les cassolettes de senteurs dans le rechaud sont bonnes, ou bien corces de citrons, oranges, & autres herbes odoriferentes brulées, sans oublier le parfum doux à des-infecter le corps, qui est tres bon pour ce sujet.

Le bon feu de bois sec, principalement en temps humide & froid, est necessaire soir & matin, le linge pour l'usage du corps, du liét & de la table doit estre bien net & changé souuent.

Les habits doiuent estre de soye, treillis ou drap qui aye peu ou duntout point de poil, ains soit liz & serré, les habits de peaux de senteurs sont bons, l'on peut parfumer le matin les habits avec parfum doux auant que les prendre, & le soir en les quitant; & comme il faut se retirer auant Soleil couché, de mesme ne faut sortir auant le Soleil leué ny à iun, ou sans estre muni de quelque remede preseruatif; partant faut dejeuner d'un peu de pain, & boire du vin trempé plus ou moins, selon la coustume ou saison, sans s'arrester à l'opinion vulgaire, qui croit vn bon preseruatif contre la peste, de boire du meilleur vin & à longs traits, ne prenant garde que cela les eschauffe & prepare à la fieure; & qu'estans saisis de peste plus tost que les autres, ils en meurent; outre cela se faut frotter les narines, les temples, le dernier des oreilles, & le poulx avec vinaigre rosat, vinaigre d'ail, de ruë ou imperial, ou bien de bonne theriaque ou baume du Peru, & choses semblables, mascher vn peu de la theriaque ou confection de Iacinte, ou semblables compositions appreuuées, sans les aualer, est bon, si ce n'est que telles cōpositions soient prinſes à iun, ou en place de dejeuner; ce qu'il faut faire rarement, principalement en temps chaud, cela pouuant plustost nuire qu'ayder à cause de la trop grande chaleur; l'abus qu'il y a eu cy-deuant à boire de son vrine à iun pour preseruatif est grand, car l'experience a fait voir que ces beueurs d'vrine ont esté aussi tost frapez de peste que les autres, & en meurent le plus souuent à cause de l'impureté de l'vrine qui reste dans le corps; Porter sur le cœur vn peu du theriaque ou sachets cardiaques est tres bon, & beaucoup meilleurs que ceux qui sont composez de l'argent
vif

vif ou de l'arsenic, la remarque ayant esté faite en l'année mil six cens vingt-huit, que les Chirurgiens qui se sont seruis de l'arsenic & argent vif, moururent bien tost; les oranges & citrons garnis & picquez de gerosles pour porter en main sont approuuez, comme aussi pommes de senteurs, boites d'argent ou d'yuoire, pleines d'esponge trempée en vinaigre, eau rose ou liqueurs de bonnes odeurs.

Quant au boire & au manger faut obseruer principalement les six maximes suiuant. La premiere, il ne faut estre ny trop plein ny trop vuide, & tousiours sortir de la table avec appetit; La deuxieme, ne faut manger de plusieurs sortes de viandes en vn repas; La troisieme, faut disposer tellement l'heure des repas que la viande prise au disner puisse estre digerée auant le souper, à quoy est bien deub enuiron cinq heures d'interuale; La quatrieme, les viandes doiuent estre de bon suc & facile digestion; La cinquieme, faut que chacun prenne garde à sa coustume, laquelle ne se doit nullement changer au manger & boire, ains se doit peu à peu corriger si elle n'est conforme aux maximes susdites. Exemple, celuy qui d'ordinaire ne mange que du pain ferin, chair de bœuf & porc salé, & boit gros vin, ne doit tout à coup les quitter pour vser seulement de volaille, pain blanc & vin delicat, il suffit d'estre sobre aux viandes accoustumées. Il y a plusieurs autres conditions pour le regime de viure que chacun peut apprendre de son Medecin; Le dernier, faut auoir le ventre libre naturellement ou par l'usage de clisteres ou pillules d'aloës lauë en suc d'eau rose, lesquelles pillules sont preferables à celles de rufus, trop chaudes & resserant le ventre lors que l'on y met de la terre celée, ainsi qu'il se pratiquoit en l'année mil six cens vingt-huit; l'usage du syrop de fleur de pesche ou de rose avec rubarbe & agaric sont bõs pour tenir le ventre libre, comme aussi l'infusion du cené faite dans le verjus, duquel l'on peut mettre vne cuillerée ou deux de bouche dans le boüillon que l'on prend à iun en place du dejeuner; finalement se faut tenir ioyeux, esuiter neantmoins les grandes compagnies & assemblées, fuir les lieux infects, cloaques & cemétieres, principalement lors que l'on remuë la terre; auquel cas si la demeure est proche de ces lieux, faut tenir les fenestres fermées.

*Remedes pour faire au commencement de la maladie
pestilentielle, attendant le secours des
Medecins & Chirurgiens.*

C'est sans doute que cette maladie n'estant point celée, l'on en guerit souuent & assez facilement, principalement si dès le commencement l'on y remédie en cette sorte: Celuy qui est saisi de peste ou des accidents, s'il vomit ou a enuie de vomir, il doit faire ce qui s'ensuit sans aucū délay: Faut prédre vn petit verre d'huile de noix ou d'olif, avec autant d'eau tiede, & quelques gouttes de vinaigre, & boire le tout ensemblement, peu de temps apres il se prouoquera à vomir mettant le doigt bien auāt dans la bouche ou bien vne plume de poule ou semblable, engraislée d'huile, apres le vomissement faut mettre sur l'estomac vne croute de pain trépée dans du vin rouge chaud & la soupoudrer de gerofle, canelle ou muscade, ou à defaut mettre sur ladite croute du theriaque, & par dessus vne seruiette chaude & la bāder afin que ladite croute demeure sur l'estomac, puis se coucher chaudement, & incontinent apres boire vn demy verre d'eau de chardon benit tiede, ou bien de l'eau de gelmandrie, ou de scabieuse, ou de souci, ou de ruë, & autres semblables herbes fortes, & à defaut d'auoir de ces eaux, faut prendre pareille quantité du suc tiede de l'vne des herbes cy dessus, adjoustant à la prise vne dragme de viel theriaque ou de confection de Iacinte ou de mitridat, ou eau piatē antipestilentielle appreuuee, la confection Achelmes y est tres-bonne meslée avec les autres, ou bien de la cōposition suiuaute: Prenez viel theriaque vne once, mitridat viel six dragmes, confections de Iacinte & Achelmes, de chacun demy once, meslez le tout ensemble & le mettez dans vn pot bien couuert, la doze est d'vne dragme iusques à deux, avec les eaux ou sucz susdits.

Ayant prins l'vn de ces breuages, faut bien courir le malade & le faire suer plus ou moins, selon ses forces, luy mettāt à la bouche quelques tranches de citron ou d'orange, ou bien vn peu de pain rosti trempé en eau & verjus simple ou rozat, faut le seicher & changer de linges, place & liēt si faire se peut, sans l'esuanter, vne petite heure apres luy faut donner vn bon boüillon de chair

où l'on aura fait cuire de l'ozeille, chicorée, bourrache, pimpinelle, feuilles de soucy & aygrats, & faut y mettre quelques gouttes de ius de citron, ou orange, ou verjus commun, ou à défaut de ce que dessus, du vinaigre; si la soif presse ledit malade, faut luy donner vne heure apres la prise dudit bouillon vn plein verre de ptizane, dans lequel l'on mettra quelques gouttes de vinaigre ou citron, ou autres choses propres pour mettre dans le bouillon; quatre ou cinq heures apres la premiere sueur faut le faire encores suer par le mesme remede, soit qu'il aye ietté bubon ou charbon, ou exantemes, & sera gouverné & nourri cōme la premiere fois qu'il aura sué; pendant que l'on fait cela, faut donner ordre que l'on appelle quelque Docteur Medecin ou Maître Chirurgien pour poursuiure la cure de la maladie, iugeant n'estre à propos d'en escrire dauantage pour deux raisons.

La premiere est, que puis que en cette maladie les plus doctes & experimentez Medecins sont bien en peine, & manquent souuent en la conduite desdits malades, tant à cause de la diuersité du naturel des malades que de la violence ou trompeuse condition de la maladie; en outre il est certain que le peuple ignorant abuseroit plustost desdits remedes encores qu'ils fussent descrits fort amplement & methodiquement, que d'en bien vsér.

La seconde, parce que le peuple estant instruit de la methode curatiue de ces maux, se penseroient en cachette; ce qu'ils ont fait que trop souuent, tant es années mil six cens vingt-huit que autres suivantes, & par ce moyen frequentoient çà & là avec plus d'assurance, & tres grand dommage au public.

Neantmoins si le bubon paroist auant la venuë du Medecin ou Chirurgien, l'on y pourra mettre chaudement dessus vn oignon cuit sous la cendre, & pestri avec vn peu de theriaque, ou bien vn cataplasme fait avec du lait & iaune d'œuf, & vn peu du leuin de froment.

Pour les charbons paroissans, faut mettre dessus vn iaune d'œuf meslé avec vn peu d'huile & quelque peu du sel desseiché, ou bien couper avec la pointe d'vn couteau ou ganif le charbon en croix & ietter dedans avec vne esguille ou poinçon, vne goutte d'huile bouillant & mettre par dessus le iaune d'œuf, sel & huile meslé ensemblement.

*Precautions pour ceux qui se treuvent auoir frequenté
les malades, ou qui se treuvent malades
apres la frequentation.*

Estant separé de logis pour faire quarantaine, il faut prendre vne potion composée de demy dragme de confection de iacinte, autant de confection Achelmes, dissoudre le tout dans de l'eau de Regina Prati, & se coucher & suer; ce fait, se faut parfumer le corps du parfum doux, & changer de linge & habits, ou bien vser du remede suivant bien apprenué.

Prenez vne pinte eau de vie, & vne pinte eau imperiale, mettez les dans vn vrinal de verre pour y infuser l'espace de vingt quatre heures, vne once theriaque, vne once confection Achelmes, & vne once confection de iacinthe, puis distilez le tout à petit feu en alembic de verre.

De ladite distillation pour celuy qui se treuve mal, en faut prendre deux bonnes cuillerées de bouche s'il est robuste; & pour preseruatif suffira d'une cuillerée.

Ce remede fait grandement suer, & ne se faut seruir des linges qui auront receu la sueur, sans les bien liciuer.

*Ordre reglé par Quartier du seruice que doiuent rendre les Maistres Chirurgiens de Santé au
traitement des malades pestifer-
rez à S. Laurens.*

Noël Felix, dit la Violette.

Iaques Crestener.

Nicolas Blanchard.

Pierre La Font.

Paul Bouffin, dit la Croix.

Charles Rouanne.

Ioachin Theuener.

Nicolas Heberliô, dit Laualec.

Ferry de la Fleur.

Gabriel Cartier. et Charles Galis.

Bertrand Andrieu, dit la Ri-


uiere.

Cosme Collet.

Thomas Hebert.

Iean de Sainte Luce.

Pierre Fraisse.



LETTRES PATENTES DV ROY,
*Auctorifans le pouuoir qu'ont les Consuls Escheuins de la Ville de
 Lyon, de conuoquer les Bourgeois & Notables à l'Hostel commun
 de ladite Ville; & contraindre tous les Manans & Habitans
 d'icelle d'aller aux Portes, Guet, & Gardes; nommer & eslire
 des Deputez pour le faict de la Santé: Ausquels est donné pouuoir
 par lesdites Lettres, de mulcter les contreuuenans par peine pecu-
 niaire, ou comme autrement il sera aduisé.*



ENRY par la grace de Dieu, Roy de France & de
 Pologne, A nostre amé & feal le Sieur de Mandelot,
 Cheualier de nos deux Ordres, Conseiller en nostre
 Conseil d'Estat, Capitaine de cinquante hommes
 d'armes de nos Ordonnances, Gouverneur & Lieutenant Gene-
 ral en nostre ville de Lyon, pays de Lyonnois, Forests, & Beaujo-
 lois, Seneschal de Lyon, ou son Lieutenant: & tous nos autres Ju-
 sticiers & Officiers, & le premier d'eux sur ce requis, & à chacun
 d'eux, si comme à luy appartiendra, Salut & dilection.

Nos chers & bien amez les Consuls Escheuins de nostre ville
 de Lyon Nous ont fait remonstrer, que de toute ancienneté ils
 ont eu, à cause de leur charge, pouuoir de faire assembler & con-
 uoquer les principaux, & plus notables, & autres Manans & Ha-
 bitans de ladite Ville en leur Hostel commun, pour ensemblemēt
 deliberer des affaires suruenans, pour le bien de nostre seruice, ou
 pour leurs affaires particuliers & politiques: & sur le rapport de
 leurs Mandeurs ordinaires mulcter par legeres peines pecunia-
 ires, applicables aux patures de l'Hostel-Dieu de ladite Ville, les
 defaillans & non comparans; sinon que par maladie, ou autre le-
 gitime empeschement ils s'en fussent excusez. **COMME** aussi ils
 ont tousjours eu pareil pouuoir en ce qui concerne la garde &
 seurte de ladite Ville, tant aux portes que autres endroits d'icelle,
 & de la garde des clefs des Portes, de laquelle ils Nous ont fait &
 presté

presté la foy & hommage. Et combien que de l'entretienement de ce Reglement depende le repos & tranquillité: neantmoins il y en a quelques-vns, lesquels refusent d'obeïr aux mandemens qui pour ce leur sont, faits, s'excusans les vns sur les priuileges de leurs Estats & Offices, encores qu'ils doiuent monstrier l'exemple aux autres, ainsi que nos principaux Officiers en nostre bonne ville de Paris font, tant de nostre Cour de Parlement, Châbre des Comptes, que autres, lesquels iournellement, & à leur tour & rang se rendent assidus à la garde des Portes, & autres charges qui leur sont ordonnées, suiuant les deliberations qui sont prinſes par les Consuls & Escheuins de nostredite ville de Paris: à l'imitation desquels leſdits Exposans desireroient nostredite Ville de Lyon estre pour ce regard reglée. A V O Y desirans leur pouruoir, maintenir & conseruer nostredite Ville en ses droictz & priuileges, & les Habitans d'icelle sous nostre autorité & protection en toute seurété.

S Ç A V O I R F A I S O N S, que pour les considerations susdites, & autres bons respects à ce Nous mouuans, A V O N S dit & déclaré, disons, declarons & ordonnons par ces presentes; Que d'oresnauant tous les Maſans & Habitans de ladite Ville, Officiers, ou autres bons & notables Bourgeois, de quelque qualité qu'ils soient de nostredite ville de Lyon, sans aucun excepter, qui seront appelez en l'Hostel commun de ladite Ville, de l'Ordonnance desdits Consuls Escheuins, par leurs Mandeurs ordinaires, soit pour affaires concernans nostre seruice, ou autres publics & politics d'icelle, seront tenus y comparoir en personne, sinó qu'ils soient excuſez par maladie, ou autre legitime empeschement, sur peine de telle amende pecuniaire, qui sera par leſdits Consuls Escheuins arbitrée, selon l'exigence des affaires, & qualité des personnes.

Et d'autant que ladite Ville est limitrophe & sur la frontiere de nostre Royaume, Voulons & Nous plaist, que le guet & gardes ordinaires accoustumées estre faites par les Habitans d'icelle, y soient continuées par les billets & breuets qui leur seront portez de la part desdits Consuls Escheuins par leurdits Mandeurs ordinaires, selon & en ensuiuant l'ancienne & loüable coustume de tout temps & immemorial, en nostredite ville de Lyon obseruée:

& qu'à ces fins toutes personnes de quelque estat, qualité, & condition qu'ils soient, exceptez les Gens d'Eglise, aillent en leur rang & ordre, tant aux Portes, comme Notables, que au Guet & Garde qui sera ordonné. **ET VOULONS** semblable Reglement estre fuiuy & obserué pour le faict de la Santé en temps de Contagion, & estre procedé contre les contreuenans & infracteurs desdits Reglemens par les peines & mulctes tant pecuniaires, que autres, selon l'exigence des cas, en esgard au temps & aux personnes, par ceux qui seront à ce Commis & Deputez par lesdits Consuls Escheuins; pourueu qu'ils soient en nombre de cinq, entre lesquels y en ayt deux de robe longue, lesquels auront tout pouuoir sur le faict de ladite Santé tant seulement. **VOULONS** en outre que les peines & amendes pour les cas susdits ordonnées & indiées, soient executées à l'encontre des contreuenans & condamnez, comme pour faict de Police, nonobstant oppositions & appellations quelconques, & sans preiudice d'icelles: A la charge toutesfois que les amendes qui seront pour les cas susdits adjudgées, seront remises és mains du Receueur des deniers communs de nôtredite Ville, ou son Commis, pour estre conuerties & employées, à sçauoir en temps de Contagion, pour la nourriture des pauvres malades: & en autre temps aux pauvres de l'Hostel-Dieu, & Aumosne Generale d'icelle Ville. Et au payement desquelles amendes Nous voulons iceux contreuenans & condamnez estre contrainsts par toutes voyes deuës & raisonnables, comme pour faict de Police, par le Preuost de nos amez & feaux les Mareschaux de France, Lieutenant de robe courte, Cheualier du Guet, leurs Archers & Sergens, Mandeurs ordinaires de ladite Ville, & le premier d'eux sur ce requis: Ausquels & à chacun d'eux Nous enjoignons de mettre à deuë & entiere execution les Sentences, ou Ordonnances tant du Bureau de ladite Santé, que de celuy de la Ville, sans aucune conniuece, ny dissimulation, sur peine de suspension de leurs Offices.

SI VOUS mandons & ordonnons, & à chacun de vous qu'il appartiendra, que ces presentes nos Lettres patentes vous fassiez li-re, publier, & enregistrer, garder, entretenir, & obseruer inuiolablement, de point en point selon leur forme & teneur, sans y contreuenir, ny souffrir qu'il y soit contreuenu en quelque sorte

& maniere que ce soit: en contraignant, ou faisant contraindre de par Nous à ce faire, souffrir & obeyr tous ceux qui seront à ce contraindre, par toutes voyes deuës & raisonnables: nonobstant, comme dit est, toutes oppositions, ou appellations, & sans prejudice d'icelles: nonobstant aussi toutes autres Lettres à ce contraires, auxquelles à la derogatoire de la derogatoire d'icelles, Nous auons derogé & derogeons par cesdites presentes. D O N N E E S à Paris, le dixième iour de May, l'an de grace mil cinq cens quatre vingts & cinq, & de nostre Regne l'onzième. Par le Roy en son Conseil, B R V L A R T.

Ordonnance de Monseigneur de Mandelot.

R A N Ç O I S D E M A N D E L O T, Seigneur de Passy, Cheualier des deux Ordres du Roy, Conseiller en son Conseil d'Estat, Capitaine de cent hommes d'armes de ses Ordonnances, Gouverneur & Lieutenant General pour sa Majesté en Lyonnois, Forests, & Beaujolois.

V E V E S par Nous les Lettres patentes du Roy cy attachées sous le cachet de nos Armoiries, en date du dixième du present mois de May, année presente mil cinq cens quatre vingts cinq, signées par le Roy en son Conseil, B R V L A R T, & seellées sur simple queue en cire iaune: Par lesquelles & pour les causes y contenuës, Sa Majesté veut & entend que doresnauant tous les Mannans & Habitans, Officiers, ou autres bons & notables Bourgeois de cette Ville, de quelque qualité qu'ils soient, sans aucun excepter, qui seront appelez en l'Hostel commun de cetteditte Ville, de l'Ordonnance des Consuls Escheuins d'icelle, par leurs Mandeurs ordinaires, soit pour affaires concernans le seruice de sa Majesté, ou autres publics & politics d'icelle Ville, seront tenus y comparoir en personne, sinon qu'ils soient excusés par maladie, ou autre legitime empeschement, sur les peines mentionnées par lesdites Lettres patentes: Par lesquelles sadite Majesté veut & entend aussi, que le Guet & Gardes ordinaires & accoustumées estre faites en cetteditte Ville par lesdits Habitans d'icelle, y soient continuez par les billets & breuets qui leur seront portez de la part desdits

desdits Consuls Escheuins par leursdits Mandeurs ordinaires. Et qu'à ces fins toutes personnes de quelque estat & qualité qu'ils soient, exceptez les gens d'Eglise, aillent à leur rang & ordre, tant aux Portes, comme Notables, que au Guet & Garde qui sera ordonné. Voulant pareillement sadite Majesté, semblable Reglement estre suiuy & obserué pour le fait de la Santé en temps de Contagion, selon & ainsi qu'il est plus amplement contenu & déclaré par lesdites Lettres patentes.

Nous en suiuant icelles, & entant qu'à Nous est, & touche, n'empeschons l'effect du contenu en icelles Lettres: ains ordonnons tres-expressement qu'elles soient suiuiues & obseruées de point en point selon leur forme & teneur: & sur les mesmes peines y portées. FAIT à Lyon, le vingt-septième May 1585.

MANDELOT.

Par mondit Seigneur,

MERLE.

LES Lettres patentes du Roy nostre Sire cy dessus escrites, ont esté leuës & publiées à haute voix, cry public, & son de trompe par tous chacuns les carrefours & places publiques accoustumées à faire crys & proclamations en cette Ville de Lyon, & par toutes les Portes de ladite Ville, afin que personne n'en puisse pretendre cause d'ignorance, & que la volonté de sa Majesté vienne mieux à la notice, & cognoissance d'un chacun. Par moy Jaques Bigaud Crieur iuré du Roy nostre Sire en ladite Ville de Lyon: Prins & appelé avec moy Jean Glatard, Archer & Trompette ordinaire dudit Sieur, ce septième iour de Iuin, 1585.

BIGAUD.

ARREST





